

LETTERA DI SAN GHJEUDA APOSTULU

	Pagina
Salutazione	1
L' impii saranu cundannati	–
Cunsigli per i Cristiani	2

LETTERA DI SAN GHJEUDA

Salutazione

1 Ghjeuda , schiavu di Ghjesù Cristu è fratellu di Ghjacumu , à i chjamati chì sò tenuti cari da Diu , u nostru Babbu , è accantati per Ghjesù Cristu.

2 Diu vi dia bundantemente u so perdonu , a so pace è u so Amore .

L'impìi saranu cundannati

3 Carissimi , bramava scrivevi per parlavvi di a salvezza chì hè per noi tutti , ma per oghje preferiscu stimulà a vostra fede , fede ch'è v'ete ricevutu una volta pè u sempre .

4 Tengu à favvi sapè chì cert'omi si sò infrugnati frà voi , umacci predetti da e Sante Scritture è chì devenu esse cundannati . St'impìi mutenu u smiritatu favore di u nostru Signore Diu in una scusa per cundotta dissoluta è rinneghenu à Ghjesù Cristu , u nostru solu Maestru è Signore .

5 Voi cunniscite digià tutte ste cose , eppuru eiu vogliu rinfriscavvi a memoria . Ghjevva hà salvatu u populu d'Israele , l'hà liberatu da l'Egittu , ma in seguitu hà fattu more quelli chì ùn avianu fiducia in ellu .

6 E' hà messu in guardia , in profundissimi bughjoni , cù catene sempiterni , per u Ghjudiziu di u Gran Ghjornu , l'anghjuli chì anu calcicatu a so dignità è abandunatu a so Dimora [Celesta] .

7 Cusì ancu Sodoma è Gomora è e cità vicine , chì si dedenu , cum'è elli , à a Fornicazione è à vizii contru natura , sò date cum'è esempiu , purtendu u castigu di un Focu Eternu .

8 In manera simile , tuttavia , ancu sti visiunarii sucichenu u so propriu essere . Inoltre disprezzenu l'Autorità è insultenu l'Esseri Gloriosi .

9 Ma quandu chì l'arcanghjulu Michéle ebbe un cuntrastu cù u Diaule è ch'ellu furmulava u so disaccordu riguardu à a spoglia di Musè , ùn purtò contr'à ellu un ghjudicamentu in termini inghjuriosi , ma disse : “ *Chì u rimproveru ti sia datu da Ghjevva^a* ”.

10 Ma ste ghjente gattive parleno inghjuriosamente di tutte e cose chì realmente ùn cunnoscenu , è tutte e cose ch'elli capiscenu per natura , cum'è l'animali irragiunevoli , in ste cose cuntinueghjenu à infragicassi .

11 Guai per elli , perchè sò andati nant'à u chjassu di Cainu , è cum'è Balaam , per l'amore di i soldi , anu dettu bugiardarie . Vulendu imità i discorsi di u ribellu Cora si sò persi .

12 Questi sò i scogli nascosti sott'acqua in i vostri cunviti d'affettu, mentre ch'elli festighjehjenu cù voi , nuli senza acqua purtati quà è là da i venti , arburi di vaghjime senza frutti , morti duie volte , stradigati ,

13 accuizzoni furiosi di u mare chì ghjettenu sciuma di vergogna ; stelle senza strada assicurata à e quale hè riserbata pè u sempre l'oscurità di i bughjoni .

14 Iè , u settimu [omu di a discendenza] d'Adamu , Enoccu , anc'ellu parlò d'elli in sta manera : “ *Eccu , Ghjevva hè venutu cù e so sante miriate, 15 per ghjudicà u mondu sanu . L'impìi , à causa di tutte e so gattive opere, saranu cundannati . A listessa sorte aspette quelli chì anu dettu parolle criminale contr'à Ellu^b” .*

16 Sti murmuratori , sempre scuntenti , viaghjenu secondu e so invidiacce . Per di più , prununzienu discorsi fumacciuti , è ammirènu e persone per interessu .

Cunsigli per i cristiani

17 Ma voi, o carissimi , ricurdatevi di e parolle predette da l'Apostuli di u nostru Signore Ghjesù Cristu ;

18 Elli vi dicianu : “ *In l'ultimi tempi affaccheranu l'impìi scherzosi . Seguitendu i so brutti desiderii camperanu luntanu da Diu^c” .*

19 Ecculi quelli chì pruvochenu e zizanie ! [St' omi] animaleschi sò spruvisti di spiritu santu .

20 Ma voi , carissimi , edifichenduvi in a vostra santissime fede , è prichendu cù spiritu santu ,

21 mantenitevi in l'Amore di Diu , aspettendu a misericordia di u nostru Signore Ghjesù Cristu in vista di a Vita Eterna .

22 E' aghjate cumpassione per certi chì anu dubbiti .

23 Salvate [li] cacciendu [li] di u focu . Aghjate pietà , ancu di l'altri , ma cù timore , odiendu perfinu a tunica maculata da u peccatu .

24 Orbè à quellu chì vi pò pruteghje di l'inciampu è piazzavvi senza macula da nanzu à a so gluriosa persona cù grande gioia ,

25 à u solu Diu , u nostru Salvatore , per via di Ghjesù Cristu , u nostru Signore, sianu Gloria, Maestà, Pudere è Autorità pé tutta l'Eternità passata è avà è pè u sempre. E' cusì sia .

a Zaccaria 3 : 2 – b Deuteronomiu 33 : 2 - Salmu 149 : 7 - Malacchia 3 :13 – c I Petru 3 : 3